

# Street Dakwah Bangi 3.0 ambil inisiatif edar pek makanan kepada orang ramai

**PROJEK** Street Dakwah Bangi 3.0 baru-baru mencipta sejarah tersendiri apabila 2,000 pek juadah berbuka puasa berjaya diedarkan kepada masyarakat setempat di sekitar Bandar Baru Bangi, Bangi dan Kajang, Selangor baru-baru ini.

Program tersebut dianjurkan oleh Pusat Kecemerlangan Pendidikan Ummah (PACU), Persatuan Belia Islam Nasional (Pembina), The Amal Project, Sisters of Jannah dan Projek Lembah Pantai itu.

Ia melibatkan sukarelawan yang terdiri daripada mahasiswa daripada Universiti Kebangsaan Malaysia (UKM) dan Universiti Putra Malaysia (UPM) di bawah Pembina cawangan Bangi.

Menurut Ketua Pegawai Eksekutif PACU Hanafi Muidnudin, objektif projek itu adalah bagi mempromosikan Kempen Ramadan Mendidik yang 'menyentuh' masyarakat.

Pada masa sama, katanya, ia turut menggalakkan penglibatan mahasiswa dalam aktiviti sumbangan dan berkhidmat sebagai sukarelawan bagi kemudahan pembangunan pendidikan mereka dan masyarakat.

"Kami mengagihkan juadah kepada golongan mahasiswa, masyarakat yang hidup di kawasan miskin bandar, musafir, pemandu-pemandu bas dan orang yang menjaga kedai.



SUKARELAWAN Projek Street Dakwah Bangi 3.0 bergambar kenangan ketika mengedarkan juadah berbuka kepada masyarakat di sekitar Bangi dan Kajang baru-baru ini.

"Setiap daripada mereka mendapat roti, air kotak, air mineral, kurma, dan nasi ayam. Malah, sumbangan itu akan diperluaskan ke seluruh Lembah Klang jika peroleh banyak lagi sumbangan," katanya ketika ditemui ketika program agihan dijalankan di sekitar Bangi dan Kajang baru-baru ini.

Hanafi berkata, selain orang Islam, pek makanan itu juga diagihkan kepada masyarakat bukan Islam untuk mereka turut sama menikmati juadah disediakan.

Sementara itu, Presiden Pembina UKM, Luqman Ariffin berkata, beliau

berharap projek itu dapat melahirkan ramai mahasiswa sebagai sukarelawan yang sentiasa menabur bakti kepada golongan memerlukan.

Bagi Ketua Beliawanis Pembina UPM, Nur Hafizah Azahari, projek itu membantu mahasiswa menjimatkan duit perbelanjaan makan demi meneruskan kelestarian hidup mereka di institusi pengajian tinggi.

"Di samping itu, saya juga berbangga selaku sukarelawanan kerana dapat mengedarkan makanan dan memberikan senyuman buat mereka," ujar beliau.



SALAH seorang warga UKM menerima bungkusan makanan daripada seorang sukarelawan.



STESEN MRT Kajang turut dipilih dalam Projek Street Dakwah Bangi 3.0.